

新纂云南通志

第七
函
十
冊

新纂雲南通志卷九十二目錄

金石考十二

後期一

元

賽平章德政碑

相公堤三字石刻

創建中慶路大成廟碑記

創建大理路儒學碑記

創大理路文廟碑

大理孔廟聖旨碑

妙應蘭若塔記

建大德橋碑記

中慶路重修泮宮記

大勝寺修造記

世祖平雲南碑

緬寧銅瓶款識

雄辯法師碑

大理崇聖寺聖旨碑

新纂雲南通志卷九十二

金石考十二

後期一元

賽平章德政碑

儒學提舉趙子元撰文

嘗謂名者實之對實者本也名者末也蓋求名而得名者名愈衰不求名而自名者實愈著大凡智者所爲貴於無迹雖欲不顯其名而名有不得而泯者是皆實之著也榮祿大夫雲南諸路行中書省平章政事賽公本烏孫國師之後早遇太祖功聞五朝政事舒徐德量寬大不求名而名自顯誠得宰輔之體即其本而觀之其於實之功者可謂至也至元申戌帝乃嘆曰雲南勝地極在遐荒自朕親臨率

兵歸附迄今役屬二十餘年撫恤之心雖切於已而下民之志亦尙未安今欲得人以革其弊公奉天子命領諸夷藩以納速刺丁月忽乃爲斷事官楊璉爲左右司郎中塔木丁爲員外郎梁曾侯瑞都事所司之土東接宋境西距蒲甘北抵吐蕃南屆交趾地方千里總隸一百餘州凡二十餘路皆公之所攝焉是歲七月抵大理下車蒞政風動神行詢父老諸生利國便民之要中慶大理兩設提舉令王榮午趙子元充其職中慶首建文廟歲祀於春秋二丁仍收置儒籍識者度公之心皆謂學校之事似乎寬緩公臨事之始而先知者何也殊不知國家政事典則紀綱法度軍旅刑措之事未嘗不自文學而始今公先其所當爲而爲之使南方之人舉知風化公可謂得實之本矣繇是省徭役招散亡恤鰥寡興儒教備水旱災禮接賢士削去

冗官建屯田制楮幣設路食以待勞民薄征稅以廣行旅饑寒者得以衣食流散者得以撫綏凡興利除害之事知無不爲與夫建省堂築驛館導水治橋興市井皆候農隙悅以使民民忘其勞凡結怨於已者公悉以恩待之忠厚之風洋洋盈耳當時號爲易治十二年冬羅槃甸蠻自昔聲教之所不及者據險恃愚屢逆使命公乃徂征傳於城下我師四圍其勢欲破謂諸將曰力攻不如德降諸將曰蠻夷不可以仁義化乘勢而攻殄無遺育必無後顧之憂公曰不然我聖主好生惡殺之心臣下體而行之職也數日城果下諸酋長各齎金馬幣帛以貢公命僚佐郎中楊璉安諭以西餘城和泥諸部望風屈膝十三年秋遣使齎檄招誘廣南溪洞是時儂土貴及左江李惟屏右江岑從威等二千人各執土物納款公以新降不受降者拜首再

三僅受以領其意及歸濃賞厚祿以旌其勤是歲廣中降者八十餘州籍四十萬戶東招靖江南開廣道不勞一矢而安定十四年春蒲甘遣大將繹多羅伯副以裨將五人士卒象馬以萬數計剽掠金齒金齒飛書求救公命萬戶忽都總管段信苴等釋圍而蒲兵始解自後蒲甘不敢犯風金齒得已安者皆公之良計也初昆明池口塞水及城市大田廢棄正途壅底公命大理等處行巡勸農使張立道付二千役而決之三年有成噫嘻公今之治南詔亦猶昔之治西秦也長安之人魯勒碑以記其德公之用心可謂至也經綸既緒凡有功於王事者公遣使聞奏朝廷莫不稱旨擢阿魯與納速刺丁爲雲南諸路宣慰使都元帥楊璉爲宣慰使副都元帥月忽乃忽你赤阿合八失爲招討使愛魯爲宣撫使總管段信苴等特加恩賜張立道爲

中慶總管各賜虎符金銀符宣勅者二百餘人以旌其功傳曰物有本末事有終始知所先後則近道矣吾嘗論名實之辨而有感於公故公能開疆闢土於不毛而不能勒勳於銅柱使南荒之人感恩於肺腑而不能繒像於公朝此公之所能者實也其所不能者名也是以何武居官無赫赫名去而人皆思之蓋公之治貴不顯而名自定是皆精誠實德有以動民之心而不在於求名之迹者有以然也公之實蹟已昭著於宇宙雖紀之金石歌之聲詩未足以發明其萬一而公之名雖三尺之童亦知之又何待之揄揚而後顯哉然國人不起甘棠之詠似有愧於召公黃童不爲騎竹之迎豈無慙於郭伋吾儕小人舍本逐末釣名干譽視公寧不愧邪邦人父老感公之德銘之琬琰以示不忘銘曰公實在已公名在人已既無慊人何足詢爲

政以德澤民以仁南方生齒親之若親遠人向化臣其未臣昔號難治公未舉醇豐功偉蹟南詔西秦追之金石永示無垠

按此碑未獲訪錄文在景泰雲南志卷十正德雲南志卷廿四李志卷十五後來所修諸本雲南通志並載之疑碑原立於咸陽王廟景泰志卷一曰咸陽王廟在郡學之西又曰府學在府治之南又曰府治在廣威門內按廣威門即令之大西門府治即今之昆華中學北院清代猶爲府署然府學及咸陽王廟不能詳其處不識即今之穀倉爲府學而昆華中學南院爲咸陽王廟故址否李元陽通志卷十二曰咸陽王廟舊爲啓聖祠萬曆元年巡撫侍郎鄒應龍蒞滇謂王雖有功茲土夷族也廟不宜與先師峙且屬啓聖故宮不可奪遷王廟於城南則碑當隨

廟移置自後廟廢改祀報功祠見康熙雲南府志卷十六不識
碑又移置何所道光雲南通志卷一九六金石門稱碑已無存
景泰志載此文而不著立碑年月惟按碑稱至元甲戌帝乃嘆
曰不言世祖則立碑在至元間又紀至元十四年擢張立道爲
中慶總管據本傳在至元十五年其餘諸人升任可考者亦在
至元十六年以前此碑之立當距至元十六年不遠景泰雲南
志賽典赤傳曰及卒邦之父老請諸朝刻石頌功立廟祀之蓋
指此碑則立碑在至元十六年然碑不言賽典赤卒者何耶賽
典赤行省雲南元史本紀在至元十年閏六月丙子而本傳<sub>卷一
二五</sub>
在十一年碑稱至元甲戌<sub>按十
一年</sub>是歲七月抵大理郭松年中慶路
大成廟記亦曰甲戌則賽平章官滇至元十年奉命十一年始

至任也柯劭忒吳廷燮雲南行省年表賽典赤爲平章政事始於至元十年者誤十二年冬招撫羅槃甸蠻事本傳在十三年後按地理志元江路所屬十二部有羅槃萬曆雲南通志卷四曰元江路羅槃甸居之則羅槃爲地名亦以稱人種經世大典叙錄政典招捕曰至元十三年正月羅甸官禾者阿禾招降本紀至元十三年十二月丁卯改雲南羅甸甸爲元江府路羅甸甸當即羅槃甸甸槃音相近十三年秋招降廣南溪洞儂士貴左江李維屏右江岑從威等事本紀在十二年十二月乙丑而不言李岑二人魏源元史新編地理志則謂在至元十四年紀年不同當據碑文爲是而碑稱廣中降者八十餘州籍四十萬戶本紀亦曰州縣三十有七戶十萬然其境後不能治姚

燧牧菴集卷十六史格神道碑曰溪洞諸夷旣降雲南公曰邕
容視左右兩江猶身之有手足今歸雲南度吾不能治必輕入
寇遣使諭之溪洞聞之翻雲南來者五十餘州後雲南爭之其
省平章爲書讓公公使先至詔聽公節度陞廣西宣撫使尋改
廣南西道宣慰司事亦見元史卷一五五史格傳屠寄蒙兀兒
史記卷七十八採牧菴集文其省平章下有賽典赤瞻思丁名
即在至元十六年前左右兩江五十餘州改歸廣西也又經世
大典叙錄政典招捕紀元貞大德間花角蠻之亂廣南西道不
能統率此所以地理志於廣南西路宣撫司下不能詳書所領
州縣也十四年春征蒲甘事詳見於經世大典政典征伐緬
甸

亦見元
史緬傳

馬可波羅行紀第一百二十一兩章所載大汗軍與

緬王之戰即此役惟人數與地理稍異耳

別有元朝征緬錄箋釋評載其事

碑稱中慶

大理兩設提舉令王榮午趙子元充其職當即儒學提舉郭松年中慶路大成廟記稱蜀士王君榮午充教官以董之使肄業焉則王榮午任中慶路提舉而趙子元爲大理路提舉也雲南府志即稱趙子元爲大理提舉又景泰志稱趙子元爲郡人正德雲南志稱楚人則趙子元爲中慶路籍惟諸通志人物志不載碑之雲南行省官吏有斷事官郎中員外郎都事而不言設左右丞參知政事其人名見於碑記而元史有傳者爲納速刺

丁

卷一
二五

梁曾

卷一
七八

段信苴

卷一
六六

愛魯

卷一
二二

張立道

卷一
六七

又月忽乃見經世大

典叙錄政典招捕孫大亨大德橋記元史本紀大德五年

秋月
忽難

忽

都見經世大典征伐元史信苴日傳緬國傳阿合八失見脫力

世官傳卷一本紀至元二十年餘則未獲見他書紀錄焉

相公堤三字石刻

高一丈廣五尺今在昆明城東南金汁河堤上

按石刻字各大二尺無年月袁嘉穀日記賽典赤開築河堤功也姑附賽典赤德政碑之後

創建中慶路大成廟碑記

郭松年撰文

惟夫子之道與天地並語小則無內語大則無外固不可以古今夷夏爲限闕然而教不徒立視王化爲遠邇王化之所及教亦隨之雲南去中國極爲荒遠其俗樸魯獷悍氍裘椎髻傳記所載以爲帝女六子即其先者是已稽之禹服道里懸絕其土地之賦色輒之貢略無與焉漢之孝武事西南夷始通使節厥後伏波征交趾而立銅柱

武侯渡瀘水而刻琬琰迹其所遺概可考焉至於唐名節鎮宋假王
號是皆正朔不加車書不一牢籠優籍羈縻不絕而已又安得如身
之使臂臂之使指比於內郡而臣之哉聖元奄有六合涵育生靈以
煦以休雖以神武四征不庭而崇儒重道設庠序明教化以作新於
吾民者多矣歲在癸丑今皇帝居潛邸龍飛之望四海所屬念祖宗
開創之艱將以纂繼洪休恢拓疆宇重以六詔八賧曾領星碎相爲
長雄干戈日尋民墜塗炭爰興弔伐之師旬時之間雲南悉定自邇
以來稍變南俗布元法署置官吏宣明憲度遠方之人始知有生之
樂矣聖上遠鑒三代之盛永爲磐石之固詔立皇子爲雲南王啓封
建也至元甲戌復命平章政事賽典赤行雲南中書省事治中慶旣
至均賦金以息民廣屯田以積穀省刑罰銷盜賊優柔厭飫甚得遠

人之心暇日集僚佐而言曰夷俗資性悍戾瞽不畏義求所以漸摩
化服其心者其惟學乎乃損俸金市地于城中之北偏以基廟學中
慶於古爲鄴闡其西南瀕昆池地甚卑濕獨北偏最爲爽塏故卜基
從之無暇於取文明之方也自餘執政暨幕府諸公例割己俸以資
之其木石之價工役之費不取于民而用以足凡爲屋五十有三楹
禮殿奠其中夫子巍然南面而堯邾沂鄒四公與夫十哲配焉兩廡
翼其旁七十子之徒及歷代名儒有功於世教者繪其像而列焉內
外有門左右有堂雙亭對峙跋翼輦飛別建講堂以爲師儒授受之
所經始於至元甲戌之冬落成於丙子之春是歲八月上丁行釋奠
禮於新宮牲幣孔嘉獻享有儀戴白垂齟怡怡熙熙迺觀迺悅於是
華夏之風燦然可觀矣初平章賽公旣始其事甫即叙而卒詔平章

政事脫脫木兒繼領省事一時參佐皆中州士夫以故攻之愈力竟
畢其功仍擇官民子弟之秀者以補學生奏復其身命蜀士王君榮
午充教官以董之使肄業焉嗚呼教無類也孰謂異俗之不可化哉
今夫雲南荒服之人非有故家流風以資於聞見也又非鄉黨師友
之習也一旦舉中國之治以加之皆反心革面若其固有者于以見
王者之德大以遐夫子之道尊而明而異俗之果不難治也他日化
成俗定人材輩出彬彬乎齊魯之風則任斯事者宜無愧于文翁云
按此碑應在孔廟惟未獲訪全文見景泰雲南志卷一及李元

陽雲南通志卷八

李志奪三十餘字

未言立於何年惟碑曰歲在癸丑

憲宗三年

今

皇帝居潛邸知作於至元年間又平章賽公既始其事甫即叙
而卒詔以平章政事脫脫木兒繼領省事則應在至元十六年